

► Di acuerdo cu Pader Rudy Lampe

# Tin persona den política cu ta gaña, horta y abusá di pueblo ya nan no tin gevoel mas

SAN NICOLAS - Un di e oradornan n'e apertura di Aña Academico di Instituto Pedagógico Arubano, IPA tabata Pader Lampe. Su tópico tabata: "Democracia den Educacion".

Manera Pader Lampe a bisa, den 10 minuut e tin cu papia riba e tópico: Balornan cu mester forma nos muchanan como

ciudadanonan responsabel den un sistema democrático di berdad. Of bisá di otro manera: Nos sistema di enseñanza mester di un curriculum nobo, esta di morele-civiele educatie. Awendia ta na moda di papia di humanitaire educatie, sexuele educatie, etc., pero Pader Lampe a bisa di kier enfocá

riba e tema morele-civiele educatie, es decir educá nos hende pa democracia.

Pa hopi hende moral y política ta manera pushi cu cachó, nan no por ta hunto cu otro. Y si nos wak rond di nos na Aruba, bo ta haya impresion enberdad cu tin un divorcio entre moral y política.

Pader Rudy Lampe ta bisa cu e ta kere cu moral y política mester ta uní cu otro. Moral ta loke ta guia tur conducta humano, distinguiendo loke ta bon y malo y loke ta husto y inhusto. Tur actividad humano, tambe política tin di haber cu norma y balornan. Un hende cu no ta respetá norma y balornan

ta haci daño na su mes y na otro. Política mester t'e actividad na sirbishi di bienestar general. Y pesey bon gobernacion kier men respet pa derechonan humano di tur ciudadano. Mas y mas nos ta bira consciente cu nos deber moral ta di lucha pa mas democracia y cu tur clase di dictadura ta immoral.

Pesey nos mester defendé e principionan di libertad, berdad y husticai y denuncia tur forma di abuso, corrupcion y gañamento cu cualkier partido of grupo político cometé, segun Pader Rudy Lampe.

## SITUACION NA ARUBA

E situacion actual na Aruba ta preocupante. Poco biaha den nos historia nos política a yega nivelnan asinabao di inmoralidad y di cinismo. Sin ningun tipo di berguenza of perdiendo tur clase di gevoel tin personanan den política cu ta gaña, horta y abusá di pueblo.

Y no solamente na nivel di cierto politiconan den Gobierno bo tin casonan di gaña, horta y abusá, sino tambe na nivel di bo sociedad tin casonan di falta di moral civico. Pesey na Aruba nos tin mester di educacion civico na sirbishi di nos democracia, Pader Rudy Lampe a sigui bisa den su discurso.

Pasobra nos democracia no ta funcioná. Nos Parlamento ta totalmente someti na Gobierno y ta renunciá asina n'e responsabilidad cu e poder legislativo tin como promé poder di nos país. Nos poder hudicial a mostra cu e no ta totalmente autonómo di e poder ehecutivo, y Pader Rudy Lampe den mesun rosea ta bisa, di no ta cuestioná cu tin Hueznan cu ta personanan excelente, pero e institucion di impartí husticia a tolera impunidad pa cierto personanan. Y e asina yama cuarto poder, nos medionan di comunicacion: Inmoral no ta tanto cierto potreinan cu nan ta publicá, sino e contenido di articulonan cu ta troce y manipulá berdad. Y sin un prensa cu ta busca e berdad, bo no por tin democracia berdadero. ■